

Troung

Wo dat Paar afholt warrt:

In den Naamen von Gott, den Vader un den Söhn un den Heiligen Geist.

Ji sünd hier na Gott sien Huus kamen. Ji willt jo troon laten vör Gott sien'n Altar un bitt üm Gott sienen Segen för jo'en Ehestand. So kaamt her, laat us Gott sien Woort över den Ehestand hören un to em beden üm de Hülpe von den Heiligen Geist.

De Bruutlüüd (un Bistänne) kaamt rin, de Orgel speelt.

Begröten von'n Altar:

Den Herrn Jesus siene Gnaad un Gott siene Leev un wat de Heilige Geist jo schenken deit, dat wees bi jo all.

oder:

Gott sien Freedden wees mit jo all.

Lööv den Herrn, mien Seel, ja von Hartensgrund lööve doch sienen heiligen Namen!

Lööv den Herrn, mien Seel, un vergeet nich dat Gode, wat he an di daan hett.

Anseggen von dat erste Leed.

Leed

(Geevt mi nu joe Trooringe, dat wi se op den Altar leggt, to'n Teken, dat Gott joen Ehestand segent.)

Laat us beden:

Herr Gott, Vader in'n Himmel, wi dankt di, dat du disse Brutlüüd / ditt Paar bit to dissen Dag behödt hest un ehr beropen, dat in ehren Ehestand dienen Namen ehrt warrt. Nimm ehr ünner diene Oogen. Dör Jesus Christus, dienen Söhn, usen Herrn, de mit di un den Heiligen Geist levt un regeert von Ewigkeit to Ewigkeit. Amen.

Tropredigt

Leed

An'n Altar

Höört wi op dat, wat in de Bibel to den Ehestand schreven steiht.

Ganz in den Anfang hett Gott Himmel un Eer maakt. Un Gott möök den Minschen na sien Bild, na Gott sien Bild hett he em maakt; un he möök ehr as Mann un Froo. Un Gott seeg allens an, wat he maakt harr, un he müss seggen: dat weer heel goot! (1. Mose 1)

Un Jesus Christus seggt: Hebbt ji nich lest, dat de, de allens maakt hett, vun Anfang an de Minschen as Mann un Froo maakt hett? Un hett he nich seggt: 'Dorüm warrt de Minsch vun Vader un Moder afgahn un sik mit sien Froo tohoop doon, un se warrt beid een Lief un een Seel warrn'? So sünd de beiden nich mehr twee, nä, nun sünd se man een Lief. Dorüm schall de Minsch nich scheeden, wat Gott tosamenfögt hett. (Mtth. 19, 4-6)

So schrifft de Apostel Paulus: Ji sünd ja nu vun Gott utwählt un heilige Lüüd, de he leef hett.

Dorüm treckt nu ok – dat ik dat so seggen do – een neet Kleed an, un dat will seggen: Jo Hart mutt vull Erbarmen wesen; weest fründlich un goot; denkt nich groot von jo sülben; bleibt sanft un sinnig, wenn een jo Unrecht deit; hebbt Geduld mit de Annern! Verdrägt jo un vergeeft jo, wenn een wat gegen den annern hett. Vergeeft jo, so as de Herr jo vergeven deit. Över all' dütt schall avers noch de Leev stahn; se is dat Band, dat allens tosamenhöllt, dat dat Leven een Stück warrt. Un Gott sien Freedden schall in jo Harten dat leste Woort hebben un den Utslag geven. Dorto sünd ji beropen as Littmaaten an een Lief. Un denn weest dankbor! (Kol. 3, 12-16)

Leeve Bruutlüüd / Leevet Paar,

Ji wöllt jo een den annern vör Gott un siene Gemeen anvertroon un biddt üm sienen Segen. Dorto laat us beden /

Beed't tosamen:

Herr Gott, du kennst us bit op den Grund. Du regeerst de Harten von us Minschen. Laat diene Oogen nich von us af und segg du to us menschlich Ja dien göttlich Amen. Hülp Herr, laat allens goot weern. Amen.

Oder:

Laat' us beden: Leewe Gott, wi dankt di, dat du den Ehestand inricht' hest. Wi dankt di ok, dat du disse Bruutlü bit vondagen behöod hest un ehr beroopen, dat se dienen Namen in den Heiligen Ehestand ehren doot. Nehm ehr unner dien Oogen. Amen.

Trofragen

So fraag ik di vör den heiligen Gott un vör siene Gemeen:

Wullt du as diene Froo ut Gott sien Hand nehmen, ehr leef hebben un ehren, Freid un Leed mit ehr deelen un den Ehebund heilig hollen bit dat de Dood jo scheidt, so segg: Ja, Gott schall us helpen. -

Un jüst so fraag ik di vör den heiligen Gott un vör siene Gemeen:

Wullt du as dienen Mann ut Gott sien Hand nehmen, em leef hebben un ehren, Freid un Leed mit em deelen un den Ehebund heilig hollen, bit dat de Dood jo scheidt, so segg: Ja, Gott schall us helpen. -

Opsteken von de Ringe

As Teken dorför, wat ji jo toseggt hebbt, geevt disse Ringe eenanner an de rechte Hand.
Geevt een den annern de rechte Hand.

Ji hebbt jo'e Ehe ünner Gott sien Woort stellt, un wüllt jo dor op verlaten, so segen ik nu as Deener von Gott siene Kark jo'n Bund to'n Ehestand, in den Namen von Gott, (+) den Vader und den Söhn un den Heiligen Geist.

Wo dat Bruuk is: De Ehelüüd böögt de Knee.

Herr Gott, wi dankt di. Du hest disse Ehelüüd tosamen geven. Wi bitt di, hool ehr Harten fast in Leev un Troe. Geev ehr dienen Geist, laat ehr in ehr Wark dienen Willen doon. Giff ehr / jem de Leev to dien Woort un diene Gemeen. Segen ehren Ehebund, dat se een den annern in den Himmel helpt. Segen ehren Ehebund dör Jesus Christus, usen Herrn.

Segen

Gott sien Hand, de över us is, de mag ok över jo blieven, dissen Dag un all de Daag. Amen.

Dat Paar steiht op.

(Dankleed)

Beed nu as christliche Ehelüüd mit us all dat Gebet, wat de Herr Jesus Christus sülven us lehrt hett.

Us' Vader in den Himmel,
laat hillig warden dien Naam,
laat kamen dien Riek.
Wat du wullt, schall warden, in'n Himmel un op de Eer.
Giff us Broot dissen Dag,
un reken us nich to, wat wi unrecht daan hebbt,
so as wi nich torecken willt, wat us andaan is.
Laat us nich afkamen von dien Recht,
un maak us free von all, wat us drifft.
Du wullt dat, du kannst dat, du deist dat ok. Amen.

oder:

Us Vaader in den Himmel,
laat heiligt weerden dien Naamen.
Laat dien Riek kaamen, dien Willen schall passeern up disse Eerd,

jüst so at in den Himmel.
Gew us vundaagen us Brot.
Vergew us all us Schuld at wi ok vergewen doot,
de an us schüllig wurden sind.
Laat us nich in Versööken kaamen
un maak us free un leddig von dat Böse.
Herr, di hört dat Riek, bi di is all de Kraft,
du herrliche Herr in Ewigkeit. Amen

Segen

De Herr segen jo un hool siene Hannen över jo.
De Herr seh jo fründlich an un wees jo gnädig.
De Herr laat siene Oogen in Leev op jo roh'n
un geev jo (+) Freedden.

All: Amen. Amen. Amen.

De Orgel speelt to'n Utgang.